

武英殿聚珍版丛书

天

地

人

物

事

理

法

義

文恭集卷三十

宋

胡

宿

撰

書啟

上謝學士

某聞昔士擁薦賢之轂有味其言至聖開隆道之門不
與其退布在方策貽厥後昆是以青雲彌高猶垂可附
之氣洪鐘善應不聞待叩之音若夫駿望逸羣高材拔
萃惠訓不倦增激于懦夫教思無窮有警于淺俗領先
覺之事業挺諸生之表儀偃伏下風講聞高誼惟日滋

久乃心不忘逖瞻京兆之門恭贊許都之刺伏惟某官
豐規冠世高藻凌雲蘊前識之道華履中庸之德範神
檢清出降乎崧極之靈天性少成鍾乃奎躔之粹文兼
三變之體學富九家之流邁天會之寢昌標卿材之獨
秀平陽充賦聯大對以飛英法坐試言射甲科而得雋
茂恩加等貢士有開爰當精汰之朝式隆出宰之寄弦
歌在御寬小過而字民鋸刃有餘批大郤而從政聊爲
漸陸式示庠絲丕變一同之風洽聞三異之化屬以堯
雲脩覲漢闕拜書奏東朔之千篇名聞乙牘獻子美之

三賦觀若堵牆更生之言有補于當世子雲之論不詭
于聖人食時之賦立成洛下之紙翔貴羣公無出其右
天子喜同其時故得度越衆賢對揚景命校文延閣動
太一之威神掌故曲臺顧后蒼之典禮練達質文之統
周知沿革之綱矧復奕世賢多家公望重處霜臺之鼎
貴奉雲陛之旦朝周公拜前更追故事之美疏傳在後
未羨曩時之榮會稽之綬旣懷承明之廬亦厭亟分半
刺聿貳方州習貫政經用儒術而飾事沈研吏道宗法
令以爲師潔素絲以在公緩柔轡以馭下道素自處刑

端益空然而宣室懷賢方佇賈生之對淮南荅詔當用
長卿之文屬兩宮求治之辰非一郡淹才之日行聞三
節之召入聯四戶之榮延企之誠中外攸若如某者實
同康瓠賤比多砥管仲之器小哉安能任大汲黯之戇
甚矣胡可適時徒以西學隆文南魚發詠思樂烝髦之
選勉懷潔已之風引童刻以自持壯夫竊笑學鼠能而
雖衆一枝不成顧輪翮以莫堪飭邊幅而奚用爰披鳥
跡之策幾換鳳鳴之筍仍且屢遘家艱坐更歲舉叔夜
之不堪滋甚原生之將落可憂知已未伸無林宗之三

辟治生不善荒楊季之一廬追時好而豈能謀藏身而
不暇姑欲脫名聲之鎖棄富貴之鞭遠同魚鳥之羣退
避英髦之域直以舜華載旦周命維新三代同風克用
直心之道四方有志未慚橫目之民庶幾尺蠖之伸更
礪鉛刀之割伏遇大丞學士輟從周衛關掌使符慶惟
桑梓之邦蒙被潤河之福加以沖襟玉裕泰宇淵淳樂
育人材克盡吹枯之力獎拔士類重嘉溢美之辭咸預
屬于徽猷皆想見于風采是用掣鈴下館曳裾高門下
由左右之容徑伸盤躡之禮苟或履錐可用溝木未捐

回珠吐以見私枉鱗毫而垂飾圯橋跪履無成孺子之名南郡橫經請誌先生之論誓將謏薄辱在品題

上兩浙均輸徐學士

某聞吾黨小子仲尼興裴然之嗟天下英才孟軻有樂得之歎斯皆樹微言于不朽敦惠訓于方來紀乎油素之間煥若日星之際世未喪道天誘其衷誕鍾上智之才卓冠生民之秀若乃蚤持鉛割夙奉師嚴以困蒙難擊之姿被諄誨惟勤之賜潛心大業雖尅核以自脩從事華辭終濩落而無用載持篆刻式叩高明庶幾一蔽

之言未罪三隅之反恭惟某官骨含天粹氣鑠神崧直
如清廟之絃溫若白虹之玉豐規不雜粲邦直之三英
勝範自居秉民彝之一德自頃龍標得雋鳳諾升華金
管第文天子重平津之對石渠建議諸老伏賈傅之能
雍容著作之庭密邇清閒之宴高文豔發皆張鸞之青
錢湧思橫流盡君房之妙筆故得爭臣進秩右史聯榮
挺漢檻之直躬造周官之華選組垂丈二旦趨紫閣之
朝牘奏三千日伏青規之地袞無闕職朝有正人大君
題柱以記名羣公奉贄而結好乃睠三吳之內地實處

九州之上腴六筭攸司鹽鐵之任爲重八材所產天地之藏實繁不有計然之謀誰佐大農之賦薦膺神璽出擁使輶紫橐記言少別螭頭之陞繡衣將命遠輝使節之旌酌寬大而撫齊民用峻清而嚴屬部疑獄所讞多惻隱而平反貪吏畏威盡望風而投劾坐統十連之國立富九州之儲不廢清談蓋出餘地金華舊業方任于寶臣羣玉仙山適嚴于冊府行看君節之召徑入天坡之崇當密贊于樞猷豈久商于功利如某者資材甚薄性習不靈會唐虞稽古之辰隸鄒魯守經之業從師鄭

校僅明六甲之書鬻技吳人會之百金之直往歲以楚
材擇秀魯席聘珍妄由窮巷之中駿奔嶢闕之下因緣
典謁獲贄編聯便坐橫經許入安昌之館末行聞道遂
登南郭之門曲敦堤耳之私屢獲鑄人之問仍以類優
之作徧加溢美之言持布鼓以過雷門方將辟易具太
牢而饗海鳥終用憂疑未接武于諸生驟纏哀于方寸
筮仕之門不及歸恩之地無階心疚自傷生意殆盡目
見金城之柳臂垂冥伯之楊弧矢四方雖夙齡而有志
蓬蒿三徑奈裋褐之不完行閭市中之書勉勤耒下之

學攻堅不銳叩寂彌空身世在心有韓非之孤憤江山
滿目多庾信之悲哀追懷圯上之言益厚胸中之愧比
者國家以裏輪式命刻鵠旌賢邁下武之有開思逃虛
而安得濫攀英軌勉策驚蹄懦夫之氣寢哀大敵之勅
可畏未能引退竊望利賓所幸者學士輟仙殿之凝嚴
當外臺之委重言念維桑之朽壤獲居分陝之西封重
撫舞雩之冠更露雕蟲之伎頑疎自愧迂闊無堪重念
夫操風斤者無可棄之材入蘭室者被維馨之美君子
之所貴乎道豈以言而廢人善歌者使繼其聲亦有教

而無類倘顧盍簪之舊未韜鄰燭之光迴珠玉一唾之
資爲風雲萬里之助左氏膏肓之疾倚在一鍼波臣枯
涸之危繫于斗水誓將白日庸荅所天卑情不任祈恩
望德依歸之至

上劉學士

自補吏中銓待罪下邑蟬得蔭而方美且無執捕之虞
鼠忌器而不投適在保全之地俄奉計臺之命俾臨權
木之酤以弓見招頗識皮冠之守得檄而喜聊慰寒泉
之心自收迹于下陳日馳魂于重仞泛赤萍之江道換

丹桂之月弦疲馬依依仰崇軒而有戀亡羊逐逐懼多
路以成迷念素志以未伸慨壯年之甫過痿人之不忘
乎起抑乃常情窮者之欲達其言良難自默敢布翹危
之懇用塵聰徹之聞幸曲霽于威嚴冀少停于神意某
聞士範敦于閭巷于以育乎人材柄用歸于朝廷于以
尊于天爵惟援能而是舉乃聳善之攸先漢世列藩之
侯得府檄而作吏魏基大正之職以州品而格人皆所
以廣王國之薦延恢士林之賞拔既周咨于行實亦博
練于才猷咸經清論之高以取當時之重明試以政無

尹何往學之譏薦登諸朝有公叔同升之美尚賢爲盛
往簡攸高降及本朝覽于前憲廣寵茂士上歸英毅之
尊擢引羣才外委价藩之長攷詳幹局參檢行能激官
政以交脩統時風而歸厚假人之名器匪易磨世之礪
石在茲內惟浮賤之蹤竊庇惠和之政偃風惟舊沐德
茲深固慚走俗之微蔑有托名之所將激昂于懦氣願
私附于高賢伏惟學士術業周深才謨高正英辭惟敏
吐五河而竝流偉量克寬吞七澤而不懣家著元功之
籍世仰清光之臣而自鷺序參飛虹光垂照備典午仙

臺之構掌卯金石室之圖剖判藝文講明憲度獨當臺
上之直徧閱禁中之書侍史執博山之鑪日薰賜服神
父秉青藜之燭夜訪成編恬榮利以自持遇沐休而不
出陳咸官薄絕居方進之前孟光年資迴處釋承之右
武帳歎積薪之學廣內厭直廬之勞擁高箱而出關肅
將靈命服毳衣而巡國大按祥刑平反有京兆之風決
囚多御史之雨間屬慎求良翰委重左符佳夢發占應
獸頭之新舊樂郊行部煥車色之朱丹體寬簡而靖民
篤中和而統事庚桑用道大移嶢嶠之風魯侯尚仁胥

萃泮林之韻動遵名教之樂居多暇豫之娛胡牀坐談
樓上之興不淺陽春度曲國中之和幾稀重以誘接寒
流惇崇雅道子將之風鑒特出每持鄉里之評王澄之
才令相高多爲士人之目搢紳廕其德宇當世仰其龍
門矧復最績已凝上心所注華林飾館卽時當發干汝
墳宣室對神半夜將前于釐席八侍高門之地竝裁方
底之書罄伸造辟之辭大展熙朝之業某姿材甚下人
地竝寒衡陋是棲乏高符而布世河清旣遇無宏略以
佐時自託跡于王塗旋服勞于吏鎖政經禱昧官守放